

四庫全書

子部

欽定四庫全書

山堂肆考卷八十三

明 彭大翼 撰

科第

應舉

漢世取士惟孝廉秀才之科為重隋唐至宋惟明經
進士之科為重至熙寧後王安石以經義取士於是
明經始廢而進士之科獨行天聖中增為六科曰博
通文典曰賢良方正曰才識兼茂曰詳明吏治曰洞

識韜畧曰軍謀宏遠其後又增以高蹈丘園沉淪草澤茂才異等書判拔萃四科通謂天聖十科南渡後又有博學宏詞科考誥詔表露布檄箴銘記贊頌序凡十二體之文故當時賢良方正則有蘇軾才識兼茂則有吳育茂才異等則有富弼書判拔萃則有余靖博學宏詞則有周必大呂東萊等

興賢能

周禮地官鄉大夫之職各掌其鄉之政教禁令正月之

吉受教法於司徒退而頒之於鄉吏使各以其所治以攷其德行察其道藝三年大比攷其德行道藝而興其賢者能者鄉老及鄉大夫帥其吏與其衆寡以禮賓之厥明獻賢能書於王王拜受之登於天府

補文學

漢始以明經射策取人以通經多寡補文學掌故故唐制明經之科開元中因崔元瓘上言問大義十道時務策三道至宋定業三經義十三道也

行禮歌詩

唐選舉志本朝貢士之科有秀才有明經有進士有明
法明書明算六科而其大要有三每歲仲冬郡縣課諸
生之成者送於尚書省此由學館而進故曰生徒行鄉
飲之禮歌鹿鳴之詩送於考功而後試之此由州縣而
進故曰鄉貢至於有德行道藝高蹈幽隱者天子則自
詔之曰制舉故當時得人之盛若韓愈李絳陸贄裴度
此由進士明經而得也韓休元稹張九齡姜公輔此由制

舉而得也李泌劉晏以童子舉裴端服郭子儀以武舉進
考行詢譽

唐薛歸登疏古之取士考素行之原詢鄉曲之譽以敦
朴為先彫文為後以舉貞賢愚為州之榮辱故李陵降
而隴西慙干木隱而西河美邵冀以禮遜升而晉人知
禮文翁以經術教而蜀士多儒未有上行而下不從者
也方今舉士明詔初下固已馳驅府寺之庭出入王公
之第陳篇希恩奏記誓報故俗號舉人為覓舉

選士俊士

禮王制命鄉論秀士升之司徒曰選士司徒論選士之秀者而升之學曰俊士升於司徒者不征於鄉升於學者不征於司徒曰造士大樂正論造士之秀者而升諸司馬曰進士隋大業中始置進士之科

射策對策

孔氏雜說漢射策與對策不同射者謂難問疑義書于策量其大小署為甲乙之科不使彰顯欲射者隨其所

得而釋之對者顯問以政事經義觀其所對文詞以定
高下漢蕭望之治齊詩射策甲科為郎匡衡家貧好學
從博士受詩數射策不中至九次乃中丙科元帝朝為
博士又給事中建初三年遂拜相

取青紫

漢夏侯勝為太子太傅每講授謂諸生曰士病不明經
術經術苟明取青紫如俛拾地芥耳

先門閥

唐薛歸登疏漢之求士必觀其行魏取放達晉先門閥
梁陳尚詞賦隋文帝納李諤之言禁浮詞煬帝始置進
士科後生馳逐競綴小文名曰策學以浮為貴

試射宮

禮射義古者天子之制諸侯歲獻士於天子之庭天子
試之於射宮

試禮部

唐禮部試舉人夜以三鼓為限宋朝用白晝不許繼燭

勸駕

漢高帝十一年詔曰賢士大夫已與我定有天下而不與吾共安利之可乎有肯從吾遊者吾能尊顯之以布告天下其有稱明德者諸侯王郡守必身勸為之駕遣詣相國府有而弗言覺免注云身勸為之駕言必須身親敦勸自為其駕車而遣之覺免者謂覺發者免其官也

奪席

通典北齊選舉多沿後魏之制皇帝出坐朝堂中楹其
濫劣者飲墨水一升文理孟浪者奪席脫容刀

與計吏偕來

漢武帝元光五年徵吏民有明當世之務習先聖之術
者縣次續食令與計偕注云縣次續食言所徵吏民詣
京師令各縣依次第接續供給飲食也令與計偕計者
上計簿使也郡縣每歲遣詣京師上之偕俱也與上計
簿之使者偕來也

隨方物入貢

唐武德初詔諸州縣號明經俊秀試取合格者每年正月隨方物入貢武后時盧承慶疏云比來天下所貢物至元日皆陳於御前惟貢人獨於朝堂拜似重物而輕人請自今貢人列於方物之前以備充度從之

圍棘

通典唐武德以來禮部閱試之日皆嚴設兵衛薦棘圍之搜索衣服譏訶出入以防偽濫焉

踏槐

諺云槐花黃舉子忙故赴舉謂之踏槐唐翁承贊詠槐
詩雨中粧點望中黃勾引蟬聲送夕陽憶得當年隨計
吏馬蹄終日為君忙

排位

宋祥符中試前一日貢院始出榜曉示逐人排坐位處
所謂之坐位榜此後世席舍之始也

監門

宋雍熙二年詔禮部試九經諸科輪番差官二人在省門監守此試院監門之始也又詔禮部引試分差官廊下察視勿容私自授受至景德中為巡試舖天聖中始有巡舖官

納紙

後唐明宗勅舉人試前五日納試紙用中書省印印訖付貢院

示題

容齋隨筆淳化三年太宗試進士出卮言日出賦題孫何等不知所出相率扣殿檻乞上指示之上為陳大義至大中祥符元年試禮部進士內出清明象天賦等題仍錄題解摹印以示之景祐元年始詔試進士題目具經史所出摹印給之更不許上請

唱名

唐舒元興舉進士見有司鈎校苛切就試尚書雖水炭脂炬皆人自將吏唱名乃得入列棘圍席坐廡下因上

書言自古貢士以來未有輕於此時者羅棘遮絕疑其奸非所以求忠直也

展限

宋朝引試率在八月中韓魏公當國日二蘓將就試黃門轍忽卧病魏公輒奏上曰今歲召制科之士惟蘓軾蘓轍最有聲望今聞蘓轍偶病未可試如此人兄弟中一人不得就試甚非衆望欲展限以俟上許之黃門病中魏公數使人問訊既聞全安方引試比常例展二十

日自後試科目並在九月後相國呂微仲語及科目問
何故延及秋末東坡為呂言之呂曰韓忠獻其賢如此
深可慕爾

賜燭

朝野雜記宋舊例廷試舉人至暮者許賜燭蓋殿深易
黑日昃則殿上燭出矣

焚香

禮部貢院試進士設香案於階前試官與舉人對拜此

唐故事也列坐設位供帳甚盛且具茶湯至於院試學
究則撤去席幕亦無茶湯渴則飲硯水皆黔其吻非故
閑之蓋防擅幕中藏文字供應人傳義耳故歐公詩曰
焚香答進士撤幕待諸生

專誦章句

談叢王荆公改科舉法暮年曰本欲變學究為秀才不
謂變秀才為學究蓋舉子專誦王氏章句而不解義正
如學究誦註疏耳

高談性命

宋熙寧間進士高談性命溺于虛無元祐初其習猶甚
故黃山谷詩棘圍深鎖武成宮談天進士雕虛空

試文

撫言手持文柄高眠寰海進學解士患經術之不明
不患有司之不公

恐變風雅

見考功負外

務抑浮華

唐高郢為禮部侍郎掌貢部務進幽獨抑浮華冗濫之風翕然一變

錯認顏標

唐侍郎鄭薰字子溥唐末為主文疑顏標為魯公之後時方未寧志在激昂忠烈遂以標為狀元標謝名第日問及廟院標曰寒進無此薰始知誤取時朝之曰主司頭腦太冬烘錯認顏標作魯公魯公顏真卿也冬烘猶

言昏眊也

首擢杜牧

唐崔郾字廣略為吏部侍郎試進士東都吳武陵謂郾曰公方為天子求竒才敢獻所益因出袖中書晉笏為郾讀之乃杜牧所賦阿房宮詞既警拔而武陵音吐條暢坐客大驚武陵曰牧方試有司請以第一人處之郾未對武陵勃然曰不爾宜以賦見還郾曰如教牧果擢異等

庭斥李權

大唐遺事開元中考功員外郎李昂主俊秀科集貢士
語之曰文之美惡盡知之矣如有請託當悉黜之既而
昂外舅薦李權於昂昂怒召權庭數之且斥權章句之
疵權曰鄙文不臧已聞命矣執事詩云耳臨清渭洗心
向白雲閑今天子春秋鼎盛不揖遜於朝而洗耳何哉
昂因訴於執政朝廷以郎官權輕自是改用禮部侍郎
為主文官

榜落李程

撫言李程字表臣襄邑王神符五世孫貞元中應宏詞
科試日五色賦先已榜落初出試場遇楊於陵於陵詢
其所賦程示之其破曰德動天監祥開日華於陵曰公
今須作狀元翌日無名於陵不平乃於故冊子末繕寫
而斥其名氏攜之以謁主文主文嘆賞不已於陵曰當
今場中有此賦何以待之曰非狀元不可於陵曰苟如
此侍郎已遺賢矣此乃李程所作亟取所納卷對之一

字不差遂擢狀元後浩虛舟應宏詞科復試此題程虞
其愈於已馳价取本觀之其破云麗日焜煌中含瑞光
程喜曰李程在裏

抵帽示公

唐高湜字澄之為禮部侍郎時試士多由權要干請湜
不能裁既而抵帽於地曰吾決以至公取之得譴固吾
分也

擺袖却餽

見吏部侍郎

當求實效

王氏雜錄王延拜中書舍人知貢舉吏部尚書盧紀與故相崔協有隙時協子頎應進士舉紀謂延曰貢舉進士當求實效無以虛名昔有越人善泅生子方晬其母浮之水上人怪問之則曰其父善泅子必能之若是可乎延退曰盧公之言為崔協恨其父因及其子至明年乃選頎為甲科人服其公

多取知名

唐李宗閔字損之典貢舉所取多知名士若唐冲薛稷等世謂之玉笋班

選士多至公卿

唐賈餗為中書舍人太和四年權禮部貢舉所選士七十五人後多至公卿

貢士後為公輔

唐崔郾轉吏部侍郎凡兩歲貢士平心閱試所擢者無

非名士後為公輔名卿者十人又權德輿身不由科第
掌貢舉三年後門生相繼為公相

兩都分試

唐選舉志賈至為禮部侍郎是歲以歲黜舉人赴省者
少奏請分兩都試從之兩都試舉人自此始

三科覆試

唐宣宗大中間天官奏云文星暗科場當有事後經三
科盡覆試考官皆罰俸

不負初心

唐人知貢舉者有詩云梧桐葉落井亭陰鎖闥朱門試院
深嘗是昔年辛苦地不將今日負初心後有下第者改
為五言葉落井亭陰朱門試院深昔年辛苦地今日負
初心

不奏私屬

唐穆宗時右補闕楊汝士與禮部侍郎錢徽掌貢舉西
川節度使段文昌翰林學士李紳各以書屬所善進士

及榜出二人所屬皆不預而鄭覃弟朗裴度子讓李宗
閔壻蘓巢汝士弟殷士俱及第文昌言於上曰今歲禮
部殊不公所取士皆以關節得之上以問諸學士李德
裕元稹皆以為然上命覆試黜朗等十人而貶錢徽李
宗閔為遠州刺史楊汝士為開江令或勸徽奏二人屬
書上必悟徽曰苟無愧心得喪一致柰何奏人私書豈
士君子所為耶取而焚之時人多之

痛懲劉幾

宋嘉祐中士人劉幾累為國學第一人驟為險怪之語
學者翕然效之遂以成俗歐陽修深惡之會公主文決
意痛懲凡為新文者一切棄黜有一舉人論曰天地軋
萬物茁聖人發公曰此劉幾也戲續曰秀才刺試官刷
乃以朱筆橫抹之自首至尾謂之紅勒帛判大紕繆字
榜之既而驗之果幾也後數年公為御試考官而幾在
廷公曰除惡務本今必痛斥輕薄子以除文章之害有
一士人論曰主上收精藏明於冕旒之下公曰吾已得

劉幾矣既黜乃吳人蕭稷也是時試堯舜性仁賦有曰
靜而延年獨高五帝之壽動而有勇形為四罪之誅公
大稱賞擢為第一人及唱名乃劉輝人有識之者曰此
劉幾也易名輝耳公愕然久之其年主司夢火山軍作
狀元今得劉輝果驗之矣又侯鯖錄歐陽公知貢舉每
閱試卷坐後常覺一朱衣人點頭然後其文入格初疑
侍吏及回視一無所見因語其事於同列為之三嘆嘗
有句云文章自古無憑據惟願朱衣一點頭又云清夜

夢中糊眼處朱衣暗裏點頭時

喜得蘓軾

歐陽公考試禮部進士梅聖俞時亦與其事得軾刑賞
忠厚之至論以示歐陽公公驚喜疑門下曾子固所為
擢為第二後以春秋對義居第一軾以書謝諸公歐陽
公見之以書語聖俞曰老夫當避此人放出一頭地也
遂黜賈邊

宋景德二年御試得李廸等先是廸與賈邊皆有名場

屋及奏名皆不與取其文觀之迪賦落韻邊論當仁不讓於師以師為衆特令就御試王文正公旦議曰落韻者失於不詳審舍注疏而立異論將令後生務為穿鑿遂取迪而黜邊

失取方叔

宋李廌字方叔華州人嘗以文謁蘓軾於黃州軾謂其筆墨瀾翻有飛沙走石之勢蓋張耒秦觀之流也及鄉舉試禮部時東坡知貢舉欲私之既而下第乃作詩自

責曰與君相從非一日筆勢翩翩疑可識平生謾說古
戰場過眼終迷日五色按唐李華文詞綺麗嘗作弔古
戰場文極思方成作為故紙與蕭穎士讀之穎士稱工
華問今時誰可及穎士曰君若加精思便能至矣華愕
然而服東坡引之言已失取方叔文也

大年拂衣

宋楊億字大年為翰林學士適禮部試天下士一日大
年會鄉里待試者或謂大年曰學士必持文衡幸預有

以教之大年乃作色拂衣而入曰丕休哉大年果知貢
舉凡程文用丕休哉者皆中選而當時坐中之客亦半
有不以為意而不用者

謝泌避覽

名臣遺事謝史館泌監試國子舉子黜落甚衆羣言沸
騰懷覽以伺其出泌知潛由他道投史館避宿數日太
宗聞之笑曰泌職在考校豈敢濫收小人不自揣分反
怨主司然固須防避又問曰何官駙導雄偉都人斂避

左右奏曰惟臺省知雜呵擁難近遂授泌知雜以避擲
甕之患

成就人才

宋程大昌權禮部侍郎一時文柄舉屬於公其成就人
才不可勝計凡今老師宿儒多公門下士也

愛惜士類

宋洪文安公遵字景嚴知禮部貢舉邈卒恃內侍王允
修勢侵辱士人公引蘇軾奏故事以聞一士賦擅場一

士對策剴切皆犯名諱公為取旨許降等奏名其愛惜士類如此

戒用疑事

宋省圍故事士子有疑許上請歐陽文忠公知舉方以古道自任將明告以崇雅黜浮以變文格至日午猶有喋喋弗已者過晡時稍闌與諸公方酌酒賦詩士子又有扣簾上請者文忠公竟出所問士忽前曰諸生欲用堯舜字而疑其為一事或二事惟先生教之觀者闕然

笑文忠不動色徐曰似此疑事誠恐其悞但不必用可也內外又一笑

落却親情

宋陳彭年詩取他權勢要明主落却親情賣至公

窺龍

宋王荆公夜讀試卷詩呈司馬君實范景仁曰蕉中得鹿初疑夢牖下窺龍始眩真

戰蟻

嘉祐中歐陽公知貢舉與范景仁王禹玉梅公儀韓子
華同事辟梅聖俞為參詳官未引試前唱酬極多歐公
詩無詳戰士銜枚勇下筆春蠶食葉聲聖俞詩萬蟻戰
酣春晝永五星明處夜堂深俱為諸公所稱


放風漢

唐劉蕡字去華寶曆二年楊嗣復放裴休等三十五人
蕡在第十五晦日蕡與同志昆明池泛舟中官仇士良
謂嗣復曰奈何以國家科第放此風漢耶嗣復懼曰昔

與菁及第時猶未風耳

得俊才

唐孫逖為考功員外郎選貢士二年多得俊才初年拔
杜鴻漸後至宰相顏真卿為尚書後年拔李華蕭穎士
趙華俱登上第



山堂肆考卷八十三

欽定四庫全書

子部

山堂肆考卷八十四

詳校官中書臣孫溶

主事臣祁韻士覆勘

總校官降調編修臣倉聖脉

校對官助教臣卜維吉

謄錄監生臣張同履

欽定四庫全書

山堂肆考卷八十四

明 彭大翼 撰

科第

登第

漢朝取士之制其射策中者謂之高第故隋唐以來
進士諸科遂有及第之目宋朝及第人為正奏名第
一甲二甲敕賜進士及第第三甲四甲敕賜進士出
身第五甲賜同進士出身又宋朝事實天子御試自

開寶六年徐士廉伐鼓訟不公帝御講武殿復試始
賜詩自興國二年呂蒙正榜始分甲次自興國八年
王世則榜始及第日賜袍笏自祥符中姚擘榜始賜
宴自呂蒙正榜始賜同進士出身自王世則榜始唱
名自雍熙二年梁顥榜始彌封謄錄編排皆始自祥
符景德之間宋朝進士過省赴殿試尚有被黜者遠
方寒士貧不能歸多有赴河而死仁宗聞之惻然自
是殿試不黜雖雜犯亦收之末名

蟾宮

見月

虎榜

唐貞元八年陸贄主文試明水賦御溝新柳詩榜中得人如賈稜陳羽歐陽詹李觀馮宿王涯李博張季友劉遵古許季同韓愈李絳庾承宣元結胡諒崔羣邢冊裴光輔萬當等皆天下孤雋偉桀之士時稱龍虎榜

鴈塔

唐韋肇及第偶于慈恩寺鴈塔下題名遂成故事

龍門

東漢地理志注交州有龍門水深百尋大魚登此化成龍不得過者曝腮點額血流此水如丹池故唐人比進士登科為登龍門

宴杏園

唐進士自神龍以來曲江杏園宴後皆于慈恩塔下題名他時有將相者則朱書之又秦中記進士杏園初會

謂之探花宴以年少二人為探花使遍遊名園若他人先折得名花則二人被罰

稱蘭省

唐進士試於禮部者出稱蘭省

入彀

唐太宗私幸端門見進士綴行而出喜曰天下英雄入吾彀中矣

添莊

唐崔羣字敦詩陸贄知貢舉羣遂及第贄妻曰陸氏又
添一莊矣及羣知貢舉其妻勸令求田羣曰余有美莊
三十所春榜放三十人是也妻曰君非陸贄之門生乎
君掌文柄約其子簡札不令就試如以君為良田則陸
氏一莊荒矣

動鼓

南部新書新進士放榜後翌日排建福門候謁宰相有
詩曰華陽觀裏鐘聲起建福門前鼓動時即其事也

打毬

唐進士開宴會於曲江亭既徹饌則移樂泛舟又有燈閣打毬之會

拔旗

五代王仁裕字德輦賀門生王溥拜相詩一戰文場拔趙旗便調金鼎佐無為按仁裕本五代周人後事宋王溥字齊物宋太祖朝拜相

釋褐

釋褐言解釋賤者之服而服藍袍也宋興國二年始賜
呂蒙正等釋褐後遂為例

淡墨榜

賈魏公談錄李紆侍郎放舉人命筆吏勒紙書榜未及
填禮部貢院字吏得疾詔令史王景終其事值景醉以
氈筆染不能加墨迨明方覺字體濃淡相間反致其妍
後遂為故事又撫言進士榜粘黃紙四張以淡墨氈筆
書禮部貢院四字粘於榜首一說唐進士榜必以夜書

書必以淡墨蓋名第者陰注陽受以淡墨書者若鬼神
之迹也又唐陸扆舉進士時方遷幸六月榜出甚暑李
士輟戲曰造榜天譏扆進非其時也又唐大中以來禮
部放榜有姓氏稀僻者號曰榜花

泥金書

開元遺事新進士及第者以泥金帖子附家書中謂之
泥金信

離席帽

青箱雜記宋初猶襲唐制士子皆曳袍出則蓆帽隨身
李巽累舉不第鄉人曰李秀才不知甚時蓆帽離身及
第後遺詩鄉人曰當年踪跡困泥塵不意乘時亦化鱗
為報鄉人親戚道如今蓆帽已離身按蓆帽本羗人首
服以羊毛為之即今氊笠秦漢時競服之後改以蓆為
骨而鞞之故謂之蓆帽

蓋番氊

秦中記唐太和八年放進士多貧士無名子作詩乞兒

還有大通年六十三人籠仗金薛庶準前騎瘦馬范郁
依舊蓋番氊

彫幘載妓

撫言唐進士會讌曲江崔豸請告假不赴乃以彫幘載
妓遊觀為團師所發崔沆為主罰錄事判云深攬蓆帽
密映氊車紫陌尋春便隔同年之面青雲得路可知異
日之心

舊衣與人

唐張籍送李餘及第詩歸去惟將新誥牒後來爭換舊衣裳以此知新進士以舊衣與人

詠霓裳

世傳大羅天放榜於蕊珠宮李義山同年詩記得大羅天上事衆仙同日詠霓裳又放榜後必有一人下世者謂之報羅使言報于大羅天也

傳衣鉢

見丞相

新郎君

撫言唐薛逢厄於宦途策羸馬赴朝值新進士綴行而出團師所由輦見逢行李蕭然斥令迴避新郎君逢遣价語之曰莫乞相阿婆三五少年時也曾東塗西抹來按團師謂團兵訓練之官由輦走卒之屬

前進士

李肇國史補得第謂之前進士俱捷謂之同年列姓名于慈恩塔謂之題名籍而入選謂之春闈不捷而醉飽

謂之打眊燥

白袍子

國史補有客譏宋濟曰近日白袍子何太紛紛濟曰由
緋袍子紫袍子紛紛化使然也又通典進士科始于隋
大業盛於唐貞觀永徽之際雖縉紳位極人臣而不由
進士者不以為美故推重進士謂之白衣卿相言白衣
之士即卿相之資也其重如此

綠衣郎

直方詩話王荆公有詩却憶金明池上路紅裙爭看綠
衣郎歐公謂荆公曰謹愿者亦復為之耶

金榜標名

江南野史五代孟賓于湖湘連上人與李昉同擢第後
昉仕宋入翰林而賓于仕南唐為令昉寄賓于詩曰初
攜書劍別湘潭金榜標名第十三昔日聲名喧洛下只
今詩句滿江南

瓊林賜宴

宋太平興國八年帝親試禮部貢士於講武殿始分五
甲錫宴于瓊林苑皆賜錄袍鞋笏又寵之以詩遂為定
制

拜黃甲

黃甲由省中降下唱名畢以此升甲之人附於卷末用
黃紙書之故曰黃甲是日貢院設香案于庭下狀元引
五甲內士人拜香案禮部亦遣官來替導置黃甲於案
中而望闕引拜

給彤騶

宋人賀甲科給騶從歸第詩黃榜開天上彤騶出禁中

見鼠銜經

宋杜鎬字文周常州無錫人將入試前夕見大鼠銜一卷置榻前視之乃孝經正義也鎬熟讀明日果於正義中出題三道遂中選

夢狗擊箭

朝野僉載裴元質舉進士夜夢一狗從竇出挽弓射之

其箭遂擊以為不祥夢神人解之曰狗第字頭也弓第
字身也箭第字豎也有擊為第也尋登第

村儒授書

渙水燕談宋真宗時艾預少年赴鄉舉逆旅中遇村儒
謂艾曰君此行登第矣艾曰賤子家于鄆無師友加之
汶上無典籍今學踈援寡聊試場屋耳儒者曰吾有書
一卷以授君詰旦奉納翌日果持至乃左傳第十冊也
熟此當取富貴後試題乃鑄鼎象物賦

擔子賣記

倦游錄張密省退夫應舉時因醉乘驢過市誤觸倒雜
賣擔子其人喧呼不已視擔中止有樂記疏一冊遂以
五十金市之其人乃去張初不攜文字止閱所買樂記
疏無何省試黃鍾為樂之末節論獨樂記為詳退夫論
擅場遂高選明年擢甲科

夢立斗下

宋袁郭初應舉夢立斗下果第七人及第

夢登塔上

東齋記事孫抃字夢得初名貫字道卿嘗語予曰某舉進士過長安夢登塔上見有人持一大文卷問之云來年春榜索而觀之曰不可問其間有孫貫否曰惟第三人有孫抃既寤遂改名抃明年放榜抃果第三名

驛舍聞詩

唐錢起字仲文吳興人天寶十年進士初起寓宿驛舍聞外有人詠曰曲中人不見江上數峯青者數四怪之

後十年就進士試試湘靈鼓瑟題詩既成公落句不屬
遂以此聯足之試官李偉曰此神助也遂中首選

華山卜筮

五代孟賓于未第時於華山神卜筮祝曰有如一年乞
一筮凡六擲卜上上大吉後果六舉始與李昉同及第
又真西山未第時將會試約友鄭達道同祈夢於梓潼
廟下遂擊其鼓題詩於上曰大叩則大應小叩則小鳴
我來一叩動天地四海五湖聞其聲是夜得吉夢其年

果中

沅江鱉

撫言唐盧肇袁州人先達問所從來答曰某袁民也先達曰袁州出舉人耶曰袁州舉人亦猶沅江鱉甲九肋者稀

蓬山鰲

盧肇江西解未謝啓巨鰲負顛首冠蓬山有司怪其語答曰頑石處山巨鰲戴之非首冠耶

九登科選

唐馮萬石聖歷初第進士大定初又中嫉惡科神龍初
中才高位下科景雲中中懷能抱器科開元初重考及
第六年中超羣拔類科十三年考判入等十六年又入
等二十六年中文詞壯麗科凡九登科選

八中科名

唐陸元方初舉明經後舉八科皆中張鷟八舉皆登甲
科員半千亦同

燒尾

邵氏聞見錄士人初登第必展歡宴謂之燒尾說者云
虎化為人惟尾不化須得燒去乃化又云新羊入群必
抵觸須燒其尾乃定又魚躍龍門化為龍必雷燒其尾
乃化

破腮

唐妓牙娘性輕率傷人肌膚進士夏侯澤為牙娘批頰
傷甚翌日往期集院澤厲聲曰昨日女子牙娘批破澤

腮同年皆駭

一第溷子

唐元結天寶中舉進士禮部侍郎楊浚見其文曰一第溷子爾有司得子是賴果擢上第按人才登高第者曰一第溷子

兩箇阿兒

撫言田台符年十六張讀年十七同年進士同佐鄭少師宣州幕嘗列題西明寺中或竊注曰一雙新進士兩

箇阿孩兒

開宴賜花

唐懿宗宴進士於曲江命折花一金合遣中官馳至宴所宣口勅曰便令戴花飲酒世以為榮

錫宴簪花

宋司馬君實曰吾性不喜華麗二十登科聞喜宴獨不簪花同年曰君賜不可違也乃簪一花

千佛經

唐張倬東之之孫數舉進士不第捧登科記頂上戴之
曰此千佛名經

五老榜

唐曹松字夢徵衡陽人昭宗天復初及第與王希羽劉
象柯榮鄭希彥同榜皆年七十餘號曰五老榜

不厭所望

續歸田錄張文景以古文馳名第四人登第不厭所望
有詩云驚天動地張文景只得南宮第四人

不肯自陳

宋范鎮字景仁舉進士禮部奏名第一故事殿廷唱第過三人禮部第一人不與必越次抗聲自陳因擢置上第鎮不肯自陳至第七十九人始出拜退就列竝無一言廷中皆異之

殿下有言

宋丁謂字公言初字謂之蘓州人嘗以文謁王禹偁禹偁稱其文與孫何可比韓柳名遂大振既而何冠多士

謂占第四自以與何齊名恥居其下臚傳之際殿下有言太宗問其姓對曰姓丁上曰甲乙丙丁合居第四復何言

廷中稱謝

渙水燕談慶曆五年仁宗臨軒賜進士第詳議官祝諫侍廷中其子唐次諮李許及二壻皆擢第每唱一名祝即稱謝是日諫五拜殿下仁宗嘉賞之

兄弟繼中

唐白樂天與弟敏中行簡三人相繼俱中科名樂天作詩自憐郡姓為儒少豈料詞場中第頻桂折一枝先許我楊穿三葉盡驚人

兄弟同登

宋嘉祐二年歐陽修知貢舉曾子固兄弟四人同登科又倪恕思愿兄弟皆登科皆偁子

衛士傳名

進士在集英殿唱第日皇帝臨軒宰臣進一甲三名卷

子讀於御案前讀畢宰臣拆視姓名則曰某人由是閣
門承之以傳於階下衛士凡六七人皆齊聲傳其名而
呼之謂之臚傳亦謂之統殿雷

神人留語

宋真州人許叔微篤志經史尤邃於醫建炎初大疫叔
微親行閭巷為之診視所活甚衆夢神人曰上帝以汝
陰功錫汝以官因留語云藥市收功陳樓間處堂上呼
盧唱六作五後叔微第六人登第升為第五人在陳祖

言樓材之間

貴游覆試

王仁裕知貢舉陶穀子邴登第名在第六宋太祖謂左
右曰聞陶穀不能教子邴安得登第因詔自今舉人凡
闕食祿之家皆令覆試

公卿縱觀

詩話東坡和董傳詩囊空不辦尋春馬眼亂行看擇塔
車按尋春馬謂孟郊春風得意馬蹄疾也擇塔車謂唐

進士開宴常寄曲江亭其日公卿家縱觀鈿車珠鞅櫛
比而至中東牀者十八九

伸脚踏李

宋紹興丙午正奏名第一人王十朋特奏名第一人李
三錫時宗室子居正奏名榜尾不樂或以詩戲之曰舉
頭雖不窺王十伸脚猶能踏李三

回頭見陳

宋周師厚在鄭獬榜及第只壓得陳傳一人自賦詩云

有眼不堪看鄭獬回頭猶喜見陳傳

騎驢

盧氏雜記唐咸通中以進士服用僭侈不許乘馬時場中不下千人皆跨長耳或嘲之曰今年勅下盡騎驢短轡長鞦滿九衢清瘦兒郎猶自可就中愁殺鄭昌圖以鄭肥偉故云

躍馬

東坡詩洗眼上林看躍馬買詩先到古宣城

特賜及第

撫言唐劉業特賜及第韋岫賀之曰三十浮名每年皆有九重知己曠代所無又宋太平興國二年禮部放進士張齊賢亦在選中有司失於掄擇真之丙科太宗不悅故一榜自呂蒙正以下盡賜及第

追賜及第

唐方干字雄飛以唇缺有司不取登科晚年遇醫補之光化中韋莊奏詞人才子時有遺賢不沾一命於聖朝

徒作千年之恨骨如李賀陸龜蒙羅鄴方干賈島温庭
筠劉德仁皆有奇才伏望追賜進士及第贈補闕拾遺
上從之

破天荒

北夢瑣言宋荊州每歲解舉人多不成名號天荒解劉
蛻以荊州解及第號破天荒又瓊州進士姜唐佐字公
弼從蘇東坡學坡嘗跋其課冊又嘗夢以二句贈之云
滄海何曾斷地脉白袍端合破天荒子由因坡翁二句

足成一篇云生長茅間有異芳風流稷下占諸姜適從
瓊管魚龍窟秀出羊城翰墨場滄海何曾斷地脉白袍
端合破天荒錦衣他日人爭看始信東坡眼力長

攀月桂

陳元老詩桃花先透三層浪月桂高攀第一枝

青雲隨步

王禹偁詩青雲隨步登華榻紅雪飄香入杏園

白日上天

唐元和十三載李源公榜三十三人皆取寒素時有詩
曰元和天子丙申年三十三人共得仙袍似爛銀花似
錦相將白日上青天

三清路

鄭谷詩丹霞照上三清路瑞錦裁成五色毫預想平生
騰踏處龍津春碧醉仙桃

一字橋

劉禹錫詩三春省壁鶯遷榜一字天津馬渡橋

櫻桃宴

撫言宴名有九五曰櫻桃六曰月燈雜進士尤重之櫻桃初熟和以糖酪以此宴進士故云櫻桃宴

橘皮榜

南唐近事給事中喬舜知貢舉進士及第者五人皆以舉數升降等甲無名子謂喬之榜類陳橘皮年多者居上

雲泥隔

宋陳標詩春官南院院墻東曉色初明日色紅文字一
千重馬擁喜歡三十二人同眼看魚變辭凡水心逐鶯
飛弄晚風莫怪雲沉從此隔摠曾惆悵去年中

姓字新

宋韓持國詩鶴使曉來華表上分明說得帝都春門開
閩闔星河在榜注神仙姓字新又王禹偁詩閑思蓬島
會神仙二百同年最少年利市襴衫拋白紵風流名字
寫紅牋

五十登第

唐孟郊年五十舉進士第

十八登第

唐房玄齡陸贄竝年十八舉進士韓愈年二十五擢第
於春官白樂天年二十七登第故其詩曰慈恩塔下題
名處十九人中最少年又宋孫洙廣陵人年十七舉進
士第

紅綾束餅

唐僖宗幸南內興慶池泛舟所司以金合進紅綾餅於
上前時進士在曲江聞喜宴上命中官以餅馳賜之故
徐濱詩曰莫欺老缺殘牙齒曾喫紅綾餅餽來一說作
盧延遜詩餅以紅綾束之故曰紅綾餅

黃帕開封

宋蔡持正崇政殿放榜詩黃帕開封出奏篇銀袍二百
玉階前威顏咫尺瞻中宸名姓傳呼下九天宮墨旋題
黃甲字禁門已簇杏花韉孤臣拜賜交悲喜相望先芬

五十年

嫵取為首

宋高宗策進士於射殿賜陳誠之秦熿等及第初南省
擢熿第一秦檜以為嫵故至是以誠之為首以其策專
主和議云按檜無子取妻兄王煥孽子熿養之因改姓
止得出身

雪齋廣錄宋梅聖俞試館職止得進士出身胡宿贈以
詩曰賦就甘泉客薦雄獨攀仙桂向秋風抽毫同上三英

座換骨纔爭第一功
瞥看靈鷲居木下
恍聞仙犬吠雲中
嫦娥應有憐才意
惟許詩人到月宮

盜詩登第

唐詩紀事楊衡字仲思吳興人初隱廬山有盜其詩登第者衡因詣朝亦登第見盜詩人怒曰一一鶴聲飛上天在否其人答曰此句知兄最愛惜不敢偷衡曰猶可恕也

竊論中科

宋章援元祐中進士第一人兄持第十人時蘇軾知貢
舉屬意李方叔令方叔之黨持一簡與之值方叔出僕
受簡置几上偶章持兄弟來訪取簡竊視乃劉向優於
揚雄論二章遂持去已而果出此題二章模倣坡作坡
取之意必方叔不知乃二章也

狀元下附榜眼探花

宋朝及第第一人為狀元授承事郎第二人榜眼第
三人探花俱文林郎第四第五人從事郎餘至五甲

終竝廸功郎

龍首

詩話宋朝狀元入相者呂文穆蒙正王文正曾李文定
廸宋元憲詳石揚休賀以詩曰皇朝四十三龍首身到
黃麻止四人

鰲頭

列子曰龍伯國有大人一釣而連六鰲故今大魁謂之
占鰲頭

芙蓉鏡

酉陽雜俎唐李固言下第游蜀遇老姥與言郎君明年芙蓉鏡下及第明年果中狀元故及第詩有人鏡芙蓉之語所遇老姥乃金天神也又固言嘗行柳樹下有彈指聲因問之柳答曰吾柳神也九烈君用柳汁染子衣矣得藍袍後當以棗糕祀我

鬱輪袍

唐王維素為岐王所知將應舉告王為地王令作琵琶

曲引至貴戚家自彈其曲曰鬱輪袍貴戚大愛之王曰此非伶人乃能文之士遂為因緣是年作大魁

夢生頭角

宋鄭獬未貴時病瘟夢至一處若宮闕有吏迎謁甚恭公謂吏曰吾思涼浴吏曰已為公辦矣引至小池池中甃以明玉其水灑灑公坐甃上以水沃身俄視兩臂生鱗視水中影則頭已角矣公驚遽出吏曰此玉龍池惜公不入其中入則為宰輔乃覺後擢進士第一為詩曰

霹靂一聲從地起到頭身是白龍翁

夢剃髭髯

宋類苑李廸字復古美髭髯御試前一夕夢被人剃削俱盡心惡之有解者曰必為狀元今歲省元是劉滋已替滋矣非狀元而何仁宗慶曆中果狀元及第

夢踐積木

撫言孫握夢積木數百踐其上自謂必作狀元蓋居衆材之上也已而果然

夢登大石

容齋隨筆莆田鄭僑字惠叔乾道己丑春省試中選未
廷對夢空中一梯雲氣圍繞竊自念曰世所謂雲梯茲
其是歟俄而身至其側遂登之及高層仰望則有大石
蒼然如鏡面正懼壓已忽冉冉升騰立於石上驚覺自
喜但不曉登石之義既而為天下第一其次曰溫陵石
起宗先是考官用分數編排石君當居上臨唱名始易
之

夢乘龍而起

撫言丁咸序未第時夢乘龍而起回顧又有駱駝在後至二十年方捷殿榜出亞其名者乃龍起次駱起因悟夢

夢騎鴈而上

宋沈晦赴省試至天長道中夢身騎大鴈搏風而上因作大鴈賦以紀其事宣和中果大魁天下遂符合其夢云

渴睡漢

宋呂蒙正未第時薄遊一縣時胡太監旦隨其父宰是
邑遇呂甚薄客有諭胡者曰呂公能詩宜少加禮胡問
警句客舉曰挑盡寒燈夢不成胡笑曰乃一渴睡漢耳
呂甚恨而去明年首中甲科寄聲於胡曰渴睡漢狀元
及第矣胡曰待我明年第一人及第輸君一籌耳既而
次榜亦中首選

老榜官

宋董德元字體仁吉州人少魁鄉舉累試禮部不第後
補文學任道州寧遠簿再被薦試禮部合格廷對為天
下第一遣報家書有詩云御筆題封墨未乾君恩重許
拜金鑿故鄉若問登科事便是當年老榜官後年七十
官至叅知政事

殿庭爭勝

涑水記聞宋太祖時王嗣宗與趙昌言爭狀元於殿前
上乃命二人手搏約勝者與之昌言髮禿嗣宗毆其幞

頭墮地趨前曰臣勝之矣上笑以嗣宗為狀元按嗣宗字希阮

京師預傳

筆談宋嘉祐中未御試前京師預傳王俊民為狀元莫知言所起及御試王荆公楊樂道為詳定官舊制詳定官不得立等第荆公以覆考官所定第一人未當別取一人為狀元樂道以為不可議論未決遂各以已之意進稟詔從荆公之議及發封乃王俊民也

果奪錦標

詩話唐盧肇黃頗皆宜春人同赴舉郡守獨餞頗明年
肇狀元及第歸郡守會肇觀競渡肇即席賦詩云報道
是龍君不信果然奪得錦標回守大慙

先著新衣

邵氏後錄宋王拱辰與歐陽公同年進士歐公自監元
省元赴廷試銳意魁天下明日當唱名預備新衣一襲
拱辰輒先衣以入歐公怪焉拱辰笑曰為狀元者當衣

此及唱名果第一

獨班謝恩

進士唱第日授敕黃敕黃用蜀中麻紙為之兩幅連粘大書某人等宜賜某等科第其可漏子又長于敕黃一尺自狀元至第二甲終皆曰宜賜進士及第自三甲至第四甲皆曰宜賜進士出身第五甲則曰宜賜同進士出身一甲唱名畢則往西廊角取敕黃執之甲內人齊則謝恩唱名後狀元獨班謝恩二名三名次為一班便

賜食相身為袍各賦詩以答皇恩唱至第五甲畢皆執
敕黃再拜殿上傳呼曰賜進士袍笏積於殿外南廡下
爭取袍皆不暇脫白襪即加綠袍於上按可漏子謂封
皮也

兩對引唱

東齋遺事宋蔡齊字子思真宗臨軒策士夜夢殿下有
菜一苗甚盛與殿基相等高及拆第一卷乃蔡齊也上
見狀貌堂堂曰得人矣詔金吾給衛士七人清道尋詔

自今第一人登第令給七人當直出入則兩對引唱傳呼狀元自此始

考官奏賀

宋理宗寶祐四年禮部試進士文天祥以法天不息為對其言萬餘帝親拔為第一考官王應麟奏曰是卷古誼若龜鑑忠肝如鐵石臣敢為得人賀又瑞陽姚勉號雪坡亦寶祐中狀元廷對至萬言

府帥遣迎

吳曾漫錄王沂公曾狀元及第還青州郡府帥聞其歸
乃命父老娼樂迎於近郊公乃易服乘驢由他門入遽
謁守守驚曰聞君來已遣人奉迎門司未報君至何為
抵此公以實告之曰不才幸忝科第敢煩太守父老致
訝是重吾過也

別試大魁

宋元豐八年禮部貢院夜四鼓火翟曼陳之方馬希孟
皆焚死其後別試焦蹈為魁諺云不因南省火安得狀

元焦

親擢大魁

宋劉章字文孺以小戴禮應鄉舉四冠其首紹興中廷對天子親擢為第一晚年好著書王充作刺孟乃作刺刺孟柳子厚作非國語乃作非非國語

御筆改名

見天

御寶封卷

宋蔡疑字文饒徽宗崇寧五年廷試第一上喜其文用御寶封試卷付國子監頒示四方又霍端友亦崇寧中狀元

受教仲淹

聞見錄宋賈內翰以狀元及第歸鄧州時范仲淹為守內翰謁文正曰某晚生偶得科第願受教文正曰君不憂不顯惟不欺二字可終身行之內翰拜其言不敢忘辭婚堯佐

宋馮當世京舉進士自鄉選至廷對皆第一張堯佐倚
外戚欲妻以女使人擁入其家頃之中人以酒肴至且
示以奩具甚厚京力辭之後富弼以女妻之再娶晏殊
女

天公有意

宋黃裳字冕仲常有魁天下之志元豐四年南劍州譙
門一柱忽為迅雷所擊冕仲聞之占成四句風雷昨夜
破孤株借問天公有意無莫是卧龍踪跡困放開頭角

入天衢次年果魁天下公有演山詩集

江神世情

雲齋廣錄慶曆中馮京領鄂州鄉薦過大江風濤洶湧
幾至沈沒來春名魁南省廷試第一受恩還鄂復過大
江風微浪穩舟楫安然公題詩江亭云江神也世情為
我風色好

謝衣鉢

撫言唐進士自狀元以下到主司宅下馬綴行而立斂

名紙通呈與主司對拜主事者云請狀元謝衣鉢謝衣
鉢謂謝與主司同名第者中間有與主司先人名第同
者即謝大衣鉢名紙謂寫名於紙上也

作名紙

唐裴思謙狀元及第以紅箋作名紙謁平康里諸妓因
宿於里中有詩曰銀缸斜背解鳴璫小語低聲喚玉郎
從此不知蘭麝貴夜來新惹桂枝香

誓作狀元

青箱雜記呂蒙正嘗與溫恭肅仲舒及一友人忘其姓名讀書於洛陽龍門山誓不作狀元不仕及唱第文穆為狀元溫恭肅已不意尚中甲科其友人隨拂衣歸隱又胡旦尚氣凌物嘗大言曰應舉不作狀元仕宦不為宰相乃虛生也及隨計之秋適坐中聞鴈乃題詩曰明年春色裏領取一行歸果魁天下

聞喚狀元

宋鄭谷登第後宿平康里題詩云春來無處不閒行楚

國相看別有情好是五更殘酒醒耳邊聞喚狀元聲

父子狀元

見世科

兄弟狀元

宋陳堯叟闈中人字唐夫省華長子太宗端拱二年狀元及第弟堯咨字嘉謨省華季子真宗咸平中狀元及第又孫何孫僅兄弟皆馳名何於太宗淳化間舉進士及廷試俱第一王黃州覽僅文編書其後曰明年再就

堯階試應被人稱小狀元後僅亦魁天下黃州以詩寄
之曰病中何事忽開顏記得時稱小狀元粉壁每題龍
虎榜錦標終屬鵲鷁原

陰德狀元

筆談宋郊兄弟同行逢一異僧曰小宋當大魁天下大
宋亦不失甲科後十年大宋復遇諸塗僧大驚曰公丰
神特異豈嘗活數萬命者乎大宋曰素貧賤安得有此
僧曰姑思之大宋良久曰北堂有蟻穴忽為大雨所浸

某編竹為橋以渡豈此是耶僧曰必是也小宋合當魁首公終不出其下比唱第小宋果大魁章聖太后謂弟不可先兄因命大宋第一小宋第十

少年狀元

宋李文正嘗言同年相國王溥二十六歲狀元後六年拜相又四年加司空又一年以一品罷相加太子太保時年四十二歸班行猶在具慶下又朝野雜記宋王宣徽拱辰中狀元時年十八沈內翰邁年二十莫內翰儔

二十二梁內翰灝張舍人孝祥王尚書佐皆二十三楊

樞密礪蘓叅政易簡木尚書待問皆二十四王丞相曾

王叅政堯臣張監丞唐卿賈內翰黯彭尚書汝礪衛舍

人徑皆二十五何僕射臬趙丞相汝愚皆二十七蔡樞

密齊宋丞相庠馮樞使京姚秘書穎王叔興昂皆二十

九陳樞相堯叟張叅政觀詹舍人駉許簽判奕皆年三

十又按遜齋間覽梁顥雍熙二年登第景德元年以翰

林知開封府卒年四十三已上二書所載顥登第年庚

與卒之年庚與世科中所錄全異姑俟就正於博學或云世傳顥八十二登第洪容齋隨筆辨其生平及致仕之歲甚明白謝表之聯好事者為之也

安排狀元

宋王沂公曾布衣時以梅花詩獻呂文穆曰雪中未問調羹事且向百花頭上開呂曰此生已安排作狀元宰相也

稱呼狀元

宋韓維字持國知潁州府時彥以狀元及第每稱狀元持國怒曰狀元無官耶自此呼時簽判彥終身銜之

元和狀元

唐張又新元和中狀元及第

大中狀元

唐莫宣卿封川縣人大中間狀元及第封川金井村有莫狀元讀書臺龍吟水

咸平狀元

宋真宗咸平元年二年皆放進士舉孫僅孫暨相繼魁天下皆汝州人按孫僅與上孫何之弟別是一人

元祐狀元

宋馬洵字巨濟南部人其父從政初未有子買一妾聞知其父母死不克葬故自鬻遂歸妾不責所負後夢一翁謝曰我妾父也聞之上蒼矣願君家富貴洵洵不絕及生子因以夢中語名洵哲宗元祐中登進士第一

嘉祐狀元

宋章衡字子平仁宗嘉祐中狀元又許將字元冲閩縣人嘉祐八年狀元及第試寅畏享天賦許世安英宗治平四年狀元及第試剛中履帝位賦人稱大許小許

紹興狀元

宋汪應辰字聖錫初名洋高宗紹興中進士第一賜今名張九成字子韶紹興中對策集英殿上曰忠鯁可嘉擢置第一王十朋字龜齡紹興中廷試第一梁克家字叔子嘗館於東齋梅花忽開有詩云九鼎燮調終有待

百花羞澁敢言芳
紹興中果魁天下

大觀狀元

宋劉知新處州龍泉縣人縣有靈溪里諺沙洲到寺上
龍泉出宰相沙洲到寺前龍泉出狀元徽宗大觀中何
執中為相知新作狀元

淳熙狀元

宋易祓字彥偉孝宗淳熙乙巳狀元及第丁未王容為
狀元

慶元狀元

宋鄒景初衡之子也寧宗慶元丙辰以春秋擢倫魁又曾從龍字天錫慶元五年進士第一人蔣重珍嘉定中擢倫魁有詞藻一篇丹陛對之句

熙寧狀元

宋葉祖洽熙寧三年進士第一上官均第二祖洽策言祖宗多因循苟且之政陛下即位革而新之蓋阿附安石故擢第一

祥符狀元

宋祥符五年徐奭狀元及第試鑄鼎象物賦

徐奭榜第二人此已下榜眼

南部新書胥偃應舉時夢徐將軍斬下頭項作詩曰昔作樹頭花今為塚中骨既覺以為不祥明年在徐奭榜第二人及第

拱辰榜第二人

青箱雜記宋劉沆字冲之吉州人母夢牛僧孺而生少

個儻任氣嘗作述懷詩虎生三歲便窺牛獵食寧能掉
尾求若不去登黃閣貴便須來伴赤城遊天聖中辦裝
赴省夢人砍落頭甚惡之解者曰狀元不到你只得第
二人公詰之答曰雖砍却頭留項在裏沆項劉留同音
後果在王拱辰榜第二人及第至和中拜相

王十朋榜第二人

宋閻安中紹興中進士及第十朋第一安中第二

王俊民榜第二人

宋陳睦絳之子王俊民榜第二人及第

堯臣榜第二人

宋韓琦相州人年二十登王堯臣榜進士第二人唱名
第一甲終太史奏日下五色雲見左右侍從皆賀於殿
上

鄭僑榜第二人

宋石起宗乾道中鄭僑榜第二人貢院有雙蓮之瑞

一聯相薦 已下探花

五代李慶工於詩有醉輕浮世事老重故鄉人之句樞
密王朴以此一聯薦於申文炳文炳知貢舉遂為進士
第三人

三世俱為

見世科

胡旦榜第三人

宋馮拯字道躋少時以文謁趙普普曰子他日位與壽
皆我若也至太平興國三年拯在胡旦榜及第第三人

宋郊榜第三人

宋鄭戩字天休天聖中試雲瑞紀官賦宋郊對一李清
臣第二戩第三高若訥第四曾公亮第五

劉煇榜第三人

宋安燾字厚卿嘉祐中劉煇榜第三人試堯舜性仁賦
公度榜第三人

宋陳敏修福州人紹興中黃公度榜第三人解試四海
想中興之美賦修第五韻云葱嶺金堤不日復廣輪之

土泰山玉牒何時清封禪之塵高宗親書此聯粘之殿
壁及唱名問云卿便是陳敏修耶復誦此聯凄然出淚
又問卿年幾何有幾子對曰臣年七十三尚未娶乃詔
出內人施氏嫁之年三十貲奩甚厚時人戲為語曰新
人若問郎年紀五十年前二十三



山堂肆考卷八十四